

Meck it JAMAICA

Jamaica's charm lies not just in its natural beauty and its people, but also in a general 'feel good' vibes.

Wen problem set een over di world An life kyaan seckle dung Everybody waan fi run weh come a Jamaica Di place wi call Jamdung A yah so di creativity an di talent come from Yah so reggae bawn an grow Yah so you fine every bush fi heal every sick But nuff people nuh know So from clear a woi ee woi pan plane an ship Dem come fi get a taste Of di one place weh meck yuh feel alright Nuh matter wat yuh race From Blue Mountain to Green Grotto Cave Yuh climb Dunn's River Falls Fish, festival, jelly coaknat an callaloo Jamaica have it all Tourist come pan two foot ankle express An some wid fancy vehicle Some wid one deggeh knapsack pan dem back Just waan fi meet di people An wedda wi have big wuck, lickle wuck or no wuck Wi gi yuh friendship from di core Wi fling open wi heart big like di Caribbean Sea Yuh kyaan help but love wi more Di sun shine wid Jamaican people wen dem smile An we meck yuh feel at ease Light an young like any spring chicken Fresh like any breeze Jamaica wi meck yuh fall in love all over again Wid yuh husban or yuh wife Fall in love wid yuh fren dem an yuh family An fall in love wid life Dis morning one big ol gray back man out a airport Fling dung himself a bawl An all di coaknat water dem gi him fi drink Couldn't calm him dung at all Hear him "Oh, my heart is dying, it shall fall from my chest Oh I cannot breathe Is like they planted mi navel string on Jamaica soil Why I have to leave Hear one white ooman she wid yie water in har yie "Never yuh mind old chap I hate the thought of the snow awaiting me at home So in a week I will be back". Di bawling stop, an mas man face light up "When yuh coming back my dear? Maybe wi kyan try a ting, yuh never know Ahm, what size ring yuh wear?" Mi laugh becaw Jamaica win an warm every single heart Becaw Jamaican people care Come a Jamaica, come fall in love wid yuhself an Meck it Jamaica every year. Article take from Joan Andrea Hutchinson's book 'Meck Mi Tell Yuh' For bookings and to order books and CDs email: Joan Andrea Hutchinson at bumpyhead@cwjamaica.com or hutche@cwjamaica.com